

## Nesco, au fiéu de l'aigo

Pèr aquéu que, dins l'estiéu, vèn à Perno pèr lou cop proumié e descuerb lou fiéu d'aigo que travèso la viloto, i'ès pas eisa de pousqué crèire qu'acò sarié la Nesco, aquesto Nesco que n'en counèis li coumbo espetaclous. Coume ? Sarié-ti poussible qu'un tant moudèste riéu, quàsi un pissourleja, aguèsse pouscu cava aquelo cluso, que si baus de gigant n'en fan un di liò li mai touristi de la Vau-Cluso ? Fau dire qu'à la ribiero, li paradosse ié fan pas pòu e qu'amo de vous estabousi...

### Dóu sourgènt fin qu'à Metàmis

Cachous, lou sourgènt de Nesco s'escound dintre li bauco dins lou terraire d'Aurèu, sus lou planestèu d'Aubioun, à gauto de Ventour, au levant, à 715 m d'aut. Après agué courregu un brèu à l'èr, vaqui que lou jouine gaudre s'engoulo lèu souto un vièi moulin d'aigo tout arrouina, lou moulin di Font. Quand n'en ressort es vengu siau, es un riéu tout simplas que s'escoulo tranquile vers lou miejour, en soubat de Saut que ribejo, avans que de s'enfusa au mitan di terrado de lavando e de pièi ajougne la coumuno de Mounièu. Nesco i'aveno lou lauset dóu Bourguet, un galant clar d'aperaqui 2,5 citaro.

Après un debuta proumetèire de la ribeiroto, pataflòu ! vaqui que s'esvarto, tout-bèu-just quàuqui centeno de mètre après sa sourtido dóu lau ! Sèmblo à cha pau de s'esvali e bèn lèu, dins sa maire, ié soubro pas mai que d'eigatiho. En fa, soun aigo s'es pas esvapourado, mai s'es embegudo dins terro à la discrèto, a trescoula dins lou sistèmo karsti di Mount de Vaucluso. D'aro-en-la, lou couladis devèn souteiran.

À-n-aquéu fenoumène, lis idrougeologue ié dison « Perdo de la Nesco ». Uno esperiènci de 2004, facho em' un marcaire, adus la bello provo qu'aquelo aigo qu'a trespira dins lou sòu aveno un maiun sousterren e que ié fau uno dougeno de jour pèr toumba li 21 km que la menon à la Font de Vau-Cluso.

Fin qu'à Metàmis, li gorgo de Nesco s'estalouiron sus pau o proun 25 km. Au mitan d'un caos de roucas pasta pèr lis oundo, i pèd de baus espetaclous que d'ùni passon li 100 cano d'aut, i'a quàuqui bèlli lono d'uno aigo quieto e lindo ounte ié nadon de troucho, entremen qu'à soun entour la maire es vuejo.

À-n-aquéu moumen, es tout ço que Nesco nous dono à vèire. Mai coume vai qu'aquesto semblanço de ribiero ague pouscu cava tàli coumbo titanenco, en pas ié regoulant, franc di tempourado de forto plucio, aquéli passo de cop desastrouso que soun la marco de noste climat mierran ?

D'efèt, lou cavage d'uno cluso noun se pòu faire qu'à la coundicioun que lou riéu dipause de proun d'energè, e d'aluvioun peréu, que ié soun d'outis pèr rousiga la pèiro. Aquèsti coundicioun soun estado reünido à l'èro quaternari, estènt que la ribiero carrejavo alor forço aluvioun venènt subretout de l'achancrimen di gorgo éli-memo. Sèmblo de i' agué agu, en aquelo pountannado de counglacamen, d'embàrri climati au trespit de l'aigo d'en surfâci : lou gela sesounié di coucho superficiale dóu sòu e li counglas que se coungrejavon dins li canau verticau dóu karst, tout acò barravo la trepanacioun de l'aigo dins lou sistèmo karsti.

L'escoulamen dins la maire de la ribiero èro alor poussible, au plus pau dóu tèmés dóu desgèu e dóu desneva. Em' un climat mai umide qu'à l'ouero d'aro, lou moulènt que jitavo lou gaudre èro mai gros, la deslamo à la primo mai viólènto e li aigo èron cargado de forço sedimen que poudien tapa de poussible poun d'embegado. Emé lou rescaufage dóu climat, lou trespír karsti dis aigo reprenguè pièi soun cours nourmau. Fuguèron alor derroumpu la rousigaduro e lou cava de la cluso. Vaquí l'ipoutèsi que fan li geoulogue d'aro pèr trouba d'esplico au paradosse d'aquésti gorgo que lou couladis atuau de la ribiero pòu pas justifica.

Li gorgo de Nesco an toustèmés fa uno grosso impressioun sus li vesitaire. Lou mai, lou baus que ié disèn « Roucas dóu Cire », uno barro vertiginouso que susproumbo lou founs de la cluso de mai de 300 m. Mistral n'en parlo dins lou cant 7<sup>en</sup> de Calendau. Lou noum de « Roucas dóu Cire » ié vendrié de la ciro que d'ùni coulounio d'abiho di sóuvajo aurièn fabreja à boudre à passa tèmés sus lou rode, en aguènt pendoula si bresco i pèiro dóu baus.

Aquelo Nesco s'encafourno  
Dins uno coumbo arèbro e sournò ;  
E vèn pièi un moumen que la roco subran  
S'enarco amount qu'es pas de dire...  
Vous parle dóu Roucas dóu Cire :  
Ni cat, ni cabro, ni satire,  
N'en responde segur, jamai l'escalaran !

Soulet, lou barbajòu lou rasclo  
De soun aleto. Dins lis asclo,  
Lis abiho sóuvajo aquí fasièn de mèu,  
Despièi d'annado emai d'annado,  
Sèns jamai èstre destournado ;  
E de la ciro amoulounado,  
Se n'en sarié carga vint couble de camèu !

Aquéu raconte pòu passa pèr fantasti, bord qu'au tèmés de vuei aquésti bàrri assouston plus, sèmblo, d'abiho sóuvajo, mai se saup que tau brusquié se podon toujours vèire un pau de pertout sus la boulo dóu mounde. Lis estajan n'en fan si fretò. Pèr culi lou « mèu de roucas », aquelo melico goustouso e forço presado, arribon is apié en s'encourdelant, pièi en s'afalant à l'agrat de sa vido de-long de la paret de roco. Acò se passo coume dins la legèndo dóu païs de Nesco que nous counto coume li boumian fasièn antan recordo de mèu au Roucas dóu Cire.

Li gorgo, e mai qu'acò la valado de Nesco, soun estado courregudo pèr l'ome de-longo desempièi la preïstòri. Lou treva pèr lis oumenen, ome de Neandertal pièi ome mouderne (*homo sapiens sapiens*), es acerta despièi lou Paleouliti mejan (Moustieren<sup>1</sup>) dins de recàti souto roco e de baumo, que lou relarg n'en comto forço. Enjusqu'aro, uno quaranteno de site preïstouri soun esta encarta, de Saut fin qu'à Venasco.

---

<sup>1</sup> 300 000 à 30 000 an avans l'ouero d'aro

Couneissèn tambèn mant un rode protoïstouri, siegue galò-rouman, siegue de l'Age-Mejan recula, maugrat que lou terradou fugue pas esta pèr lou moumen proun esploura dins aquelo partido. Nous leissè tambèn l'Age-Mejan la pertoucanto capello *Sant-Miquèu d'Anesca*, bastido au siècle XII<sup>en</sup>, restaurado dóu tèms de la Reneissènço, en 1643. Es uno bastisso moudèsto, que nous esmòu pèr sa pousicioun au founs de la cluso, toucant la ribiero, souto un tresplomb de roco, just en-dessouto de dous recàti souto roco preïstouri, coume se li que trevèron à-de-rèng aquéu rode majestous countuniavon de coumunica entre éli de dela li siècle e li milenàri.

Lou pouplamen dóu terraire es pièi ana en creissèn au fiéu di siècle ; fuguè à soun pountificat au siècle XIX<sup>en</sup> e, d'aquéu tèms, coume brounzinejavo la vau de Nesco !

Sara pamens soulamen au siècle XX<sup>en</sup> que se bastira uno routo dins li gorgo de la Nesco, entre Vièlo e Mounièu, alor que lou proujèt avié creba l'iòu en 1859. Lou traçat es estigança à mié-autour entre lou founs de la coumbo e lou planestèu que lou doumino. Lou chantié coumencè vertadieramen en 1911. Fuguè uno obro longo e dificilo que demandè lou traucamen de quatre pertus.

L'annado 1914 vèis circula li proumiéris autò sus la routo nouvello, meme s'aquelo noun fuguè fin finalo acabado avans 1927, à l'encauso de l'orre chaple que faguè la Grand Guerro demié li jouvènt dóu païs. Ansin, la coumbo de Nesco averè en plen sa voucacioun touristico, alor que fin qu'à l'acabamen de la routo D 942, se poudié abourda lou rode que pèr de camin mal-eisa. Es d'aiours à-n-aquelo epoco que li proumié guide de tourisme recoumandon de vesita li gorgo.

À l'ouro d'aro li touristo soun noumbrous que vanegon sus aquesto viò, sié en veituro sié à velò, e tambèn li caminaire que regon pèr soun plesi lis estré draïòu escalabrous à gauto de baus emai li dóu founs de la coumbo.

### De Metàmis à Sorgo

À la sourtido di gorgo, après Metàmis, uno dougeno de riéu venon rebouta un fiéu d'aigo dins la maire que paressié seco. Lou couladis de Nesco countùnio alor à l'èr libre. Rajo encaro à-de-rèng souto sièis vilage, avans que d'arriba à la vilo Perno-li-Font. Eici, lou canau de Carpentras pourgis à la ribiero soun tribut, just en amount de la viloto, en estènt que mesclo d'aigo de Durènço à-n-aquelo que davalò di Mount de Vau-Cluso.

Vèn fin finalo se jougne à la Sorgo de Veleroun sus lou terraire de Perno, proche lou pont de Capelli. Sa vido de ribiero independènto aura dura 53 km e Nesco aura alor tounba si 650 m de desnivela de soun sorgènt à soun jognènt, que n'ï'a 360 m rèn que dins la coumbo.

Un dis àutri paradosse de la Nesco se trobo dins li mounto-davalò de soun debit. L'avès visto siavo, brave pichot rajèiròu de pas rèn, mai es capablo de se descadena tout d'uno e de s'enmalicia pèr lou simple efèt d'un endoulible. De 130 l/segoundo dins soun couladis coustumié, soun debit se pòu vèire multiplica pèr 500 e passa jusqu'à 70 m<sup>3</sup>/segoundo dins lou cas d'uno eigado centenàri.

Acò parlo soulet que dins talo escasenço, la ràbi dis aigo arrouino tout sus soun passage e que lou malastre es jamai liuen. Mèfi ! alor pèr l'asardaire que, pèr de dire de s'espaceja, se sarié endraia à touto zuerto dins lou valat sènso s'èstre assabenta de la meteò, vo pèr lou bouscatié insoucitous qu'aurié entre-pausa de bos dins la maire agoutado !

L'istòri de Nesco es d'aiours marcado de mant un raconte d'aucidènt survengu en d'estajan empourta coume brout de paio pèr lou riéu descabestra. D'uni escapèron sa pèu e d'evoto fan provo de sa recouneissènço pèr lou miracle que ié gardè la vido sauvo. D'àutri aguèron pas 'questo chanço.

Lou dramo de janvié 1994 es sèmpe dins tóuti li tèsto, tant à Venasco coume à Perno : un jouine de Venasco, Jordy, qu'à l'encauso dis aigo auto sa maire menavo au coulège en autò, pousquè pas se desentrava de la veituro enmenado pèr la suto deliéurado de Nesco e mouriguè de malo-mort. Dous an après la creigudo d'Óuvezo, que la remembranço n'èro encaro uno plago au viéu, lou país fuguè tournamai estèrni pèr un dòu tant amar.

Lou biais à vòuto tourmentau de Nesco fai que soun noum ancian, *Anesca*, fuguè long-tèms coumpres coume eissi dóu grè e voulènt dire « la Ravajarello ». Aro, d'uni pènson que lou noum vendrié pulèu de dos racino galeso, *anam* (palun) e *esca* (aigo). L'ipoutèsi es refourtido pèr lou caractèr palunen enjusqu'à l'Age-Mejan dóu rode dóu jounnènt de Nesco em 'uno di Sorgo.

À passa tèms, Nesco jougavo un role ecounoumi de proumiero, que n'a plus aro. Sus soun cours, i'a agu 34 moulin de blad qu'utilisavon l'energìo que la ribiero ié baiavo, pèr lou biais de resclauso e de toumbado. Soun aigo servié tambèn en d'àutris usanço, tàli que lou lavage. Poudié i' agué d'abus, coume n'en fan fe dos letro de messidor an X e termidor an XI (juliet 1802 e 1803) que nous soun estado servado. Lou proumié conse de Perno i' escriéu au souto-prefèt pèr denuncia li pratico d'un negociant que lavo si lano dins lou courrènt subre lou vilage, valènt-à-dire d'amount, sènso se soucita de la poulucion que coungreio aquesto ativeta. L'aigo, qu'es lou bèn publi pèr eicelènci, pòu alor plus servi i àutris usage « necite à la vido dis ome e di bèsti ».

Davans lou cinisme – deja –, d'un particulié sènso-gèino, un qu'entre-marchavo pèr se uno ressourso coumuno que devrié èstre sacrado pèr tóuti, se poudèn pas empacha de faire lou raprouchamen emé la poulucion qu'aro aclapo à passado la ribeireto. I'a d'endré sus soun trajèt, ounte es couchado de bourdiho, quouro pèr de depost à l'escoundudo d'eisino routo, quouro pèr lou vuja de pousoun vo de laissez de l'agriculturo e de l'endustrìo...

En 2007, uno associacioun pernenco<sup>2</sup> se fissè pèr toco d'apara Nesco e soun enviroonamen, d'engarda sis relarg naturau e de ié lucha contro la poulucion. Fai gacho pèr douna l'alerto dins lou cas d'uno souiarduro nouvello e, chasque an, ourganiso uno journado pèr que d'abitant bountous netejon la maire e li dougo. Malurousamen, à chasco campagno se rabaio sèmpe qu'auqui vagounet – aperiquí uno vinteno – de salouparié de touto meno, ço que marco bèn que se soun pas amoussa li biais de faire delinquènt.

L'associacioun prenguè, i'a gaire, pèr emblèmo un pichot aucèu, lou merle-eiguié que se n'en pòu vèire long de Nesco, en amount, d'Aurèu à Mounièu. Gros aperiquí coume lou merle de

---

<sup>2</sup> La Nesque Propre

nòsti jardin, aquéu d'aquí trevo li ribo di gaudre d'en mountagno, que ié pourjon viéure e sousto. Es un temouin, em'acò lou simbole de la pureta de l'aigo, mai nous ramènto tambèn coume es impourtanto dins la cluso la diversita requisto de la fauno e de la floro.

D'ùnis espèci soun meme dicho endemico au site, valènt-à-dire que li poudès trouba que dins lou cantoun, pèr eisèmples uno floureto blanco que retrais un pau lou muguet, la Niveirolo de Fabre (*Acis fabrei*), descuberto en 1882 pèr un de Vièlo que ié disien Bousquet. La pourgiguè à Jan-Enri Fabre, qu'en la pas couneissènt la mandè au Museon d'Istòri Naturalo.

Proumié, fuguè identificado coume uno Niveirolo de Niço (*Acis nicaensis*). Forço raro, la floureto s'escound pèr un siècle e res la vèi plus enjusqu'à 1978. À la perfin, en la miés estudiant, li sabènt coumprendran que la fau destria de sa sorre, d'abord que si flour soun un pau diferènto. Ié dounaran alor soun noum, en oumenage au *felibre di tavan*, qu'èro pas qu'un entoumoulougisto de triò, mai peréu un boutanisto.

Aqueste patrimòni, fragile e precious, vauquè i Gorgo de Nesco d'èstre noumado en 2007 Zouno Especialo de Counservacioun, dins l'encastre dóu maiun éuropen Natura 2000.

#### Uno aigo masco

Tout de long de soun camin, Nesco nous a estouna e candi au travès di païsage varia que percoulo, pèr soun biais chanjadis, pèr sa coumbo ufanouso que porto respèt, pèr l'istòri dis ome dins soun relarg... Desenant, en vous permanant ras si dougo, à Perno, souto li gràndi platano, quand l'entendrès cascaieja à vòsti pèd, siéu bèn seguro que la regardarès pus dóu meme uei... Belèu meme que vous leissarès enmasca, coume d'ùni lou soun esta avans vous, pèr aquesto ribiero que pòu èstre fado autant coume coulobre...

Roulando FALLERI – mars 2013